

SANTUEN PROTESTAK

*GURE IZENEKO FESTA
FOLKLORE BESTERIK EZ DA,
BESTE GUZTIEN ANTZERA GEUK BE
EGITEN DOGU PROTESTA*



1.

“Ba datoz santu ta santak”,
jendearen poz ta kantik...
Gu ez gaitue asko poztuten
faltsokeriazko plantak.

2.

Mendi, baserri ta kale
danak dira santuzale,
gure kontura ta gure kontra
gau ta egun jo ta dale.

3.

“Negua negu” esanda,
santu-santa barik joan da;
gure errukiz izaten ei da..
zelan egin propaganda!

4.

Hor gabiltz haizetan sarri
baztarren barregarri;
gure kontura, euren probetxuz
jentea zelan ekarri...

5.

Adi gure ingurura,
dana atso-agura;
gugaz gaupasa eginda gero,
gazteak dira logura.

6.

Luzia eta Xixili,
hobe da egon ixili...
Kale ta plaza jai egin eta
eleizarako bijili!

7.

San Nikolas ta Bixente
nor ete da inuxente?
Gure atxakiz juerga eginda
gu barik dabiltz dexente.

8.

San Permin eta San Anton,
zezen ta txarrien Patron;
gizonik ez dan ganau-artetik
gu bagoaz ta hor konpon!

9.

San Blas ta San Antonio,
ez dogu gitxi balio;
Mezan ez, baina dantza-plazetan
zenbat kristau ta indio!

10.

Ez daukagu atrakorik,
ez manifestazinorik;
bakotxa bere orduan dator,
ez da behar sekuestrorik.

11.

Badira maitale finak,
maiordomu atseginak;
zaintzen ditue gure ermitak
ta konpontzen itoginak.

12.

Ondo ospatu gure jaiak,
igaro ordu alaiak;
eta ez ahaztu gu gareala
zuen zeruko anaiak.

A. Martzel